

總 739

73

105



中国国家图书馆  
NATIONAL LIBRARY OF CHINA

楹聯錄存三

德清俞樾



許子舒大令輓聯

子舒宰江陰以公事至省垣卒於行館余從前館  
江右玉山子舒曾執經從余讀也

百里播循聲鳧舄不歸童子空騎郊外竹  
卅年尊舊夢雞窗同學老夫曾賞筆頭花

黃仲陶大令輓聯

仲陶杭州人宦游吳下於正月上旬生十二月下  
旬卒年六十一

家杭州宦蘇州行跡一生皆福地 來正月去臘月平  
頭六十是完人

吳母韓太夫人輓聯

太夫人爲清卿河帥母清卿聞太夫人病疏請歸  
省未及歸而太夫人先卒

慈蔭冀常留方期上壽百齡鳳詔疊借鳩杖至 君恩  
許歸省誰料長途千里朱軒竟換素車回

金立甫太守輓聯

立甫宦游吳下被議而歸齋志而歿其蘇寓亦在  
馬醫科巷與余比鄰

門望稔侯高伏櫪悲鳴白首猶存千里志 園林吳市  
寄連牆笑語綠楊曾作兩家春

宋叔元觀察輓聯

觀察充浙江書局提調與余同事其子澄之明經  
爲余門下士乙酉應順天鄉試中副榜

玉局賴提綱十載相從同對青編憐暮景 金臺頻盼  
捷一椎誤中要留黃榜慰重泉

彭雪琴尚書輓聯

尚書歿於庚寅三月六日余至二十三日始聞之  
爲詩一百六十韻哭之又寄題此聯於其靈右尙

書功業滿天下不待余言惟念自己巳春始與相  
識及西湖退省庵成與余湖樓相望晨夕過從情  
逾昆弟又申之以昏姻乃去年九月嘉興一見遂  
成永訣能勿泣然數年以來因病不能書久無親  
筆書今年二月中口占一書命侍者寫以寄余殆  
與余訣乎封口鈐吟香館主小印猶與平昔無殊  
也

功業在天下聲名在柱下我懷姻婭私情只論退省庵  
中歷歷心頭廿年事 哭別於九月聞訃於三月公已  
支離病榻猶有吟香館內恩恩口授數行書

曾劄剛侍郎輓聯

劄剛乃吾師文正公長子襲侯爵官卿貳歷使海  
外諸邦精於西學

論世務有心得論經術有家傳參中外以獨成其學  
爲朝廷惜重臣爲師門惜令子合公私而一慟斯人  
又

劄剛篤信西學服西醫之藥而卒故聯語云然然  
此聯實擬而未用也

大瀛海環游爲國宣威方宰相門重出將 一刀圭誤  
事以身垂戒使知西法不宜中

薛子白大令輓聯

子白爲心農大令子自少隨宦浙江曾從余游後  
亦以縣令仕浙年未五十而卒去歲曾饋余以家  
製橙糕至今食之未盡也

始隨宦繼服官曩時舊雨適從老我曾叨一日長 未  
五旬已千古去歲新橙製贈至今猶賸隔年香

湖上高氏別業聯

武林高仲英白叔昆仲作別業於蘇隄鎖瀾橋邊  
距花港觀魚甚近有水門可通舟樹石亦皆有致  
選勝到裏湖過蘇隄第二橋距花港不數武 維舟登

小榭有奇峯四五朶又老樹兩三行

李心根封翁八十壽聯

封翁爲杭州太守伯質李君之父庚寅三月九日  
爲其八十年生辰余適至杭州卽往祝輿中得此聯  
爲太守誦之越日卽以玉版箋索書亦壽言中所  
罕見者也

自杖朝到百齡看令子由二千石黃堂而登開府 距  
修禊纔六日爲先生寫十三行玉版以祝延年

彭剛直公祠聯

楹聯乃古桃符之遺不過五言七言今人有至數

十言者實非體也世傳雲南大觀樓聯最長合上  
下聯亦不過一百八十字今年湖上彭剛直公祠  
落成其湖南同鄉撰一長聯寄余點定其聯凡二  
百七十字余因亦自撰一聯共三百十四字

偉哉斯真河嶽英靈乎以諸生請纓投筆佐曾文正創  
建師船青旛一片直下長江向賊巢奪轉小姑山去東  
防歛髮西障溢潯日日爭命于鋒鏑叢中百戰功高仍  
是秀才本色外授疆臣辭內授廷臣又辭強林泉猿鶴  
作霄漢夔龍尙書劍履迴翔上接星辰少保旌旗飛舞  
遠臨海澨虎門開絕壁巖崖突兀力扼重洋千載後過

大角礮臺尋求故蹟見者猶肅然動容謂規模宏壯布  
置謹嚴中國誠知有人在悲夫今日旂常俎豆矣憶  
疇昔傾蓋班荆借阮太傅留遺講舍明鏡三潭勸營別  
墅從珂里移將退省庵來南訪雲樓北游花陽歲歲追  
陪到煙霞深處兩翁契合遂聯兒輩因緣吾家童孫幼  
君家女孫亦幼對穠華桃李感暮景桑榆粵嶠初選舉  
足已憐蹙蹙吳閩七至發言益覺啾啾鴛水遇歸橈俄  
頃流連便成永訣數月前於右台仙館傳報噩音聞之  
爲潛焉出涕念酒坐尙溫琴歌頓杳老夫何忍拜公祠

彭母常恭人輓聯

恭人爲剛直公子婦後公四月而卒其長女歸余  
孫陞雲今年四月中因剛直公卒而歸得侍湯藥  
者兩月

阿翁椿蔭初積正期獨力持家手理田園兼以一經傳  
膝下 有女蓬門遠嫁猶幸先期歸省躬親湯藥尙能  
兩月侍牀前

張子青相國八十壽聯

相國生於七月八日

郭汾陽遇天孫後一日 文潞國相元祐前四年

包子莊孝廉輓聯

余辛亥年避兵定海與孝廉同乘火輪船至滬上  
半夜有風濤之警距今三十年矣孝廉卒於安慶  
書此輓之

滬濱避烽煙半夜怒濤還如昨 皖江傳噩耗卅年舊  
雨又亡君

汪母倪太夫人八十壽聯

夫人生於十二月二十七日先期於十月稱觴是  
日適爲其孫納婦也

秋鬢綠如初萱壽八旬看膝下文孫剛好迎將新婦至  
臘鐙紅欲近梅花數點爲堂前愛日故教移到早春

來

蔣澤山大令輓聯

澤山為生沐先生子先生即刻別下齋叢書者也

澤山登乙亥賢書與定海黃以恭諸暨陳偉東陽

龔啟孫仁和徐琪馮崧生錢唐汪行恭丁立誠皆

肄業詁經精舍榜後有俞門八儁之日余初不知

之其子初民茂才所撰行述言之當不誣也澤山

後以知縣仕廣東光緒己丑充鄉試同考官出闈

大病旋卒

八儁出吾門如君自有家傳別下齋中淹雅共推名父

子 一官職民社到死不離文字至公堂上辛勤還似

秀才時

函亭鄉侯廟聯

函亭鄉侯蔣澄字少明東漢初人也其父橫佐光

武平赤眉之亂後以讒死九子皆徙江南侯其第

九子也居陽羨以父讎未復恒鬱鬱帝憐之為誅

其讎封侯為函亭鄉侯明帝時立廟回圖至今存

焉有唐至德二年碑其裔孫乞書祠聯錄碑文見

示碑偽不足據然萬姓統譜所言與碑大略相同

姑據碑文為撰是聯碑云澄為蔣詡五世孫故用



三徑竹事

周公苗裔漢室侯封溯當年志復父讎忠孝兼全不媿  
元卿三徑竹 陽羨寓廬回圖廟貌看此日福流里社  
烝嘗勿替長存至德二年碑

應敏齋廉訪輓聯

敏齋官江蘇仕至按察使未竟所施而去余與同  
舉於鄉又同庚今年皆七十矣不謂其遽以微疴  
謝世也

溯治績在三吳是宜開府開藩與湯陸諸賢長留民愛  
享遐齡剛七袞我亦同庚同榜哭牙期老友兼歎吾

衰

許星臺方伯賀聯

今年九十月間方伯夫人大病幾危幸而無恙一  
孫入泮一孫授室書此賀之

十月小陽春阿翁老而矍鑠阿婆病後康強金母木公  
雙福壽 全家大歡喜一孫秀擷芹芬一孫香圓蘭夢  
青童玉女衆神仙

季碩女史輓聯

季碩姓曾氏歸張子敬祥齡古之所謂女士也能  
詩畫篆隸且優於德著婦禮通考一書未竟而卒

病中有句云伏生老去傳經倦願作來生立雪人  
爲余作也

婦禮補三通夫婿多情篋零星尋舊稿 清才兼衆  
妙老人何幸門牆立雪訂來生

任母 夫人輓聯

夫人爲任後園中丞之配久病不瘳至今歲而卒  
其女孫許嫁於劉氏及吉期而夫人卒乃於夫人  
大歛之後至舟中遣嫁焉

疾疢已多年頓教夫婿衰齡寂寂總帷哀永逝 悲歡  
同一日堪歎嬌孫新嫁恩恩畫舫賦催妝

姚彥侍方伯輓聯

方伯以農部起家仕至廣東布政使罷歸今年有  
旨引見未及行而卒

有詔欲趨朝絲竹東山猶以蒼生存遠志 斯人不聞  
尉疆理南海深爲聖世惜良材

嚴伯雅太守輓聯

伯雅以太守需次江蘇能詩有養花館詩稿十二  
卷甫刻成而卒其妹爲皖撫沈仲復夫人同時謝  
世其弟縉生太史各以一聯輓之頗沈痛傳誦於  
時

吟草刻初成才名空滿江南未許詩人眞領郡 同枝  
吹並折噩耗又傳皖北那教老弟不傷心

沈室巖夫人輓聯

夫人爲皖撫沈仲復之配仲復奉 命署兩江總  
督未赴而夫人卒其從前寓居吳下耦園有聽櫓  
樓有鰈硯廬鰈硯者仲復得一異石文理自然成  
魚形剖而琢之爲二硯硯各一魚與夫人分用之  
故曰鰈硯而卽以顏其室云

雙節拜新恩雨花臺畔旌麾惜未魚軒同戾止 耦園  
尋舊夢聽櫓樓頭燈火不堪鰈硯再摩挲

曾忠襄公輓聯

光緒十六年十月兩江總督曾公薨公爲文正公  
介弟其功業在 國史無待臚陳歿後 恩禮優  
渥贈太傅謚忠襄溯曾氏一門父子兄弟得謚法  
者五人建專祠者四人贈太傅者二人不獨我  
朝所罕求之列代亦爲僅見矣

耀旂常虎武龍文溯始事於楚告成功於吳又有大造  
於晉至去年霖雨奇災仁粟義漿兼施兩浙 鍾靈秀  
三湘七澤予謚法者五建專祠者四晉贈太傅者二數  
列代淩烟盛蹟玉昆金友足冠千秋

許子喬刺史輓聯

子喬官山東東平州知州移牧膠州未赴而卒生  
數子皆天一女僅十齡孀妻扶櫬由運河南下然  
在東平頗有政聲張朗齋中丞據以入告 敕於  
東平舊治建立專祠亦不虛死矣

有兒早夭有女猶雛最憐縞素扶棺一路風霜共南下  
惟帝念功惟民感德想見黔黎拜廟千秋俎豆在東  
平

韓母王太夫人輓聯

太夫人自言忠孝節義萃于一門蓋其夫以百夫

長死難已守柏舟之節諸子能手刃父讎而舊時  
僕媪相依流離不去故也諸子中次子晉昌官永  
州鎮總兵三子慶雲官江蘇候補道曾署糧道最  
知名總戎入 觀 皇太后詢及太夫人年  
歲晚年又以捐資助賑 敕建樂善好施坊亦備  
及哀榮矣

忠孝與節義萃于一門好施樂善綽楔袞揚更有仁聲  
動朝野 壽富至考終合成五福武達文通兒孫鼎盛  
曾邀天語問年齡

丁月湖先生輓聯

先生名寶書吳興耆宿也精於目錄之學宋元舊籍收藏繁富校勘精詳著述之志甚盛潘嶧琴學使續刻兩浙輶軒錄屬先生採訪湖郡之詩得數百家尙擬再訪未竟而卒

溯乾嘉以來學派相承惟先生鉛槧精詳當世同推眞種子歎茗雪之間風詩誰採想使者輶軒悵望此邦頓失老成人

潘伯寅尙書輓聯

伯寅以文恭公之孫由翰林起家人直 兩書房官至工部尙書兼管順天府事愛士憐才崇尙經

術引掖後進有古大臣風今年順天府屬災於水每對災黎爲之泣下爲籌振濟不遺餘力亦可謂以死勤事者矣

以宰相孫供奉翰林數十年老書房憐才愛士自任斯文物望重朝端八百孤寒同感泣 拜司空公兼領京兆五六月大霖雨禦患捍災不遺餘力遺章聞闕下九重恩禮異尋常

陳舫仙廉訪六十壽聯

舫仙爲湘軍宿將助望頗重於時兩江制府曾忠襄公薨於位舫仙實總領湘軍頗藉其鎮撫之力

登吳會名區嬰鏃六旬翁笑聽綺席清歐對臘鐙酌春  
酒 數湘軍宿將崎嶇百戰後行拜彤延恩命持玉節  
鎮金陵

表姊姚恭人輓聯

姊爲平泉舅氏長女吾母之兄女而吾婦之女兒  
也年八十有四其仲子子雲孝廉爲山東泰安州  
書院山長其季女歸許子衡大令隨宦雲南姊年  
來深以爲念

至親關中表生小相依於吾母爲姑姪於吾婦爲弟兄  
往事不堪再回首 上壽近期願全歸何憾有愛女在

滇南有愛子在山左暮年未免兩懸心

朱蓮生明經輓聯

蓮生曾游於黔客興義 府張春潭觀察幕中曾苗  
民不靖以一書生率偏師收復普安縣城總督吳  
文節公欲爲請獎敘謝不受乃奏保光祿寺署正  
銜從其志也暮年居上海充求志書院副監院每  
課必與焉余忝主求志講席見其所爲經解洋洋  
萬餘言甚奇之輒置之前列蓮生執弟子禮甚恭  
然實長於余四歲也年七十五而卒

功成一笑不慕侯封從前鐵馬金戈竟以頭銜六品老

齒長四齡謬叨師事此後青燈黃卷更無手稿萬言  
來

郭筠仙侍郎輓聯

侍郎由翰林起家權廣東巡撫內厯禮兵兩部侍  
郎充出使英法大臣經濟學問見重一時余丁酉  
同年又翰林前輩也

爲翰苑爲封疆爲海外幃軒青史長留不朽事 是同  
年是前輩是楚中耆宿白頭頓失老成人

嚴芝生同年七十壽聯

芝生於八月下旬生日而於月初爲文孫娶婦贈

以此聯祝而兼賀也

一雙嘉耦小比肩堂上拜生朝闈中慶滿月 七十老

翁大稱意今年娶新婦叨歲抱曾孫

高力臣總戎六十壽聯

力臣爲湖北漢陽鎮總兵九月十六日其生日也

玉帳漢江秋過重九佳節登高拜九重恩命 金樽明

月滿正十六良宵旣望慶六十生辰

許星臺方伯輓聯

余與方伯交最久前贈諸聯言之詳矣今年奉

詔入都卒於通州僅一孫侍側是可悲也

領郡始豫章而吳中而浙中陳臬開藩兼權節鉞白首  
老同年十載過從回思話別衙齋猶如前日事 克家  
得賢子有文孫有曾孫珠蘭玉樹森列庭階黃梁大春  
夢三更旅館堪歎送歸泉壤僅一小同存

朱璞山封翁輓聯

璞山官太湖同知素負吏才未竟其志有二子皆  
美材其長君伯華觀察余門下士也璞山與余皆  
生於道光辛巳歲是歲於正月二日立春而其生  
也猶在立春之前星命家仍以庚辰大寒論則視  
余若長一歲矣

抱此才略惜無此遭逢尙餘伏櫪雄心有子幸能成父  
志 長我一年實與我同歲等是懸車暮齒哭公兼亦  
歎吾衰

郭汝雨明府輓聯

汝雨由廣文改知縣署常熟縣既受代民欠二萬  
餘千是歲又值水災乃慨然曰民困如此再擾殘  
黎不如身任之乃以官款墊之如民欠數民得免  
而身累矣然郭固閩鉅族汝雨有九子六孫第五  
子曾焜已舉於鄉繼起未艾也

自秉鐸至鳴琴生平惟盡所當爲早已感孚徧遐邇



不病民甘累已造物將何以圖報請看繼起衆兒孫

戚母錢太恭人輓聯

太恭人爲戚英甫同年室錢衍石先生女也能詩  
工書且善分書戚豐初余與英甫同官翰林兩家  
眷屬擬結伴入都而英甫奉諱歸不果旋亦卽下  
世矣其子人銑以刑曹官京師而恭人自與少子  
居家鄉今年病歿年七十有九

已逾七袞遐齡止爭一歲光陰竟不少延登耄壽 頓  
觸卅年舊夢回憶兩家眷屬曾謀結伴到京華

鮑伯熙太守輓聯

太守爲華潭中丞之子曾文正公年終考語有世  
家子弟能耐勞苦之語署九江守卒於官年未六  
十也卒後三日其側室高氏仰藥以殉

官止二千石壽未六十年方期幢引碧油重紹家聲開  
幕府 帝知佳子弟民歌賢父母誰料樓成白玉并教  
房老殉泉臺

李少荃傅相七十壽聯

五百年名世之才上緯天維下理地軸 七十載從心  
所欲西摩月鏡東弄日珠

又

以黃閣老臣兼青宮太傅九畿坐鎮五等崇封德威及  
萬里遐陬翻笑唐李郭宋范韓勲業事功不離寰宇內  
先元宵十日祝上相千秋梁案齊眉謝庭繼武恩禮  
自九天下逮遠軼漢張蒼魏羅結富貴壽考再屆古稀  
年

崧鎮青中丞六十壽聯

中丞今年五十有九豫祝焉是年公弟錫侯中丞  
開府蜀中弟兄同時兩巡撫搢紳榮之

先一歲祝六十生辰正玉昆金友同領封疆當代合肥  
堪媲美 爲兩浙顛九重恩命就越水吳山特開制府

昔年敏達與同符

寶文靖公輓聯

佩衡相國寶璽謚文靖丁酉同年也五六歲時其  
封公口授以金剛經卽背諷不遺一字可知真靈  
位業中人自有宿根矣

五十年同歲生平時悵舊雨稀逢一旦驚台星驟隕  
廿四考中書令早日擅金經宿慧千秋垂青史賢名  
負雲甫御史大夫輓聯

雲甫亦丁酉同年罷官後僑寓天津年八十二而  
卒其孫於今科中式京兆榜第二名猶及見之也

享大年兼備達尊三看賢孫折桂而回白髮重親正喜  
滿門皆杞梓 歎同譜又凋碩果一從文靖騎箕之後  
黃墟再慟自憐暮景亦桑榆

查子伊貳尹輓聯

子伊以微員需次吳中去年臘月二十九日卒於  
震澤縣丞署其子燕緒余孫陞雲同年時充日本  
使臣隨員

以微員薄宦吳中最憐風冷具區臘鼓送回仙吏烏  
有令子壯游海外誰料電飛列缺星槎催返孝廉船  
劉文楠觀察輓聯

文楠當金陵不守時其父母弟妹死寇難者十餘  
人感而投筆從戎積功至觀察其才略之優可想  
也

承一門忠烈之餘投筆從戎公憤私讎皆得盡 歷卅  
載艱難而起葢棺定論文才武略兩俱優

清溪書院講堂聯

時吾邑修葺書院董其事者屬書此聯

合天目茗溪諸勝龍飛鳳舞而來鍾毓英才宜此地  
承拙明方虎之遺經術文章相望續修舊業在羣賢

王氏長外孫喜聯

聊三  
王氏長外孫念曾字少侯娶許氏二外孫女爲婦  
於正月十六日成禮顧而樂之爲書此聯

十六良宵對明月金尊還如元夕 一雙嘉耦看春風  
玉樹總是孫枝

許室施恭人輓聯

許子社明經之配也平日喜持齋念佛於十二月  
初九日微笑而逝室中有旃檀香

過臘八日含笑歸真但有旃檀香不滅 誦元九詩傷  
心營奠定知虛幌淚難乾

羅景山軍門輓聯

軍門以軍功起家官至福建福甯鎮總兵升福建  
提督調湖南提督罷歸復起仍爲福甯總兵壬申  
之歲先兄壬甫守福甯余往省太夫人起居軍門  
正官福甯鎮一見如故觴余於望海樓出所著思  
痛錄見示蓋紀嚴州戰事也先兄旋卒於福甯郡  
署乃至今年軍門亦卒於福甯鎮署追念舊游爲  
之泣然

崎嶇百戰後飛揚大纛高牙浙閩草木都仰威名猶不  
忘巖陵城外數載艱難往事重提示我親編思痛錄  
荏苒廿年前省識輕裘緩帶襄鄂英雄更饒儒雅試回

聯三  
憶望海樓頭一樽談笑舊游如夢吳公兼慟對牀人

廣化寺大殿柱聯

寺在孤山之陽唐宋人所稱孤山寺也初名永福  
陳文帝天嘉元年建唐元和十二年僧惠皎鑄法  
華經於寺之石壁長慶四年畢工元微之有記宋  
大中祥符開始改名廣化寺有辟支佛塔

建刹傍孤山溯天嘉永福初基試與等長慶殘碑讀微  
之遺記 題楣仍廣化還大中祥符舊觀願重立辟支  
古塔刻法華真經

李黼堂方伯輓聯

黼堂以江西藩司護巡撫謝病歸著 國朝耆獻  
類徵一書卷裘繁富往年曾寓居浙江於孤山築  
芋禪精舍即在俞樓之後

謝節鉞以歸來徵文考獻遂有成書大筆千秋垂信史  
愛湖山而寄寓煨芋談禪長留名蹟小樓一角附芳

鄰

竇母張太恭人七十壽聯

太恭人乃甸膏大令之母甸膏為河內人余從前  
視學中州曾來應童子試以試卷汚墨遂將所作  
文與同縣范君余竟取入府學而甸膏又遲十年

乃入學會以諸生從戎有戰績今以縣令官吳中  
七月三日爲其母稱觴因贈是聯

趁七月新涼祝阿母壽到期頤齒杖榮頌寵命定從天  
上至 憶卅年舊事看令子材兼文武牙琴虛賞英雄  
未入彀中來

樂峯中丞母太夫人七十有八壽聯

樂峯中丞奎俊自山右移節吳下於六月初五日  
至吳前一日太夫人生日也行年七十有八矣是  
年閏六月乃補以此聯壽之

使節帝移來鷗坊鶴市羅拜慈軒見說七旬剛晉八

壽觴天補與雪藕冰桃重開家宴又看六月過初三

莊芝田大令輓聯

大令曾從戎有戰績其先德官浙中故大令亦筮  
仕於浙余孫兒陸雲入學時適知吾邑取第二  
於從戎見戰績於從政見吏才溯先世治譜傳家又以  
循良達朝聽 在吾邑爲父母在吾家爲師友記小孫  
童年就試曾因文字受公知

浣花夫人祠聯

江叔海自蜀中書來言浣花溪上新建冀國夫人  
祠欲余撰一聯寄刻祠中夫人乃唐時崔甯妾任

氏甯入朝留其弟寬守成都楊子琳乘閒襲據其  
城寬戰力屈任募士自將以進子琳大懼遁去新  
舊唐書並載此事然未言封冀國夫人楊升庵集  
言成都浣花溪有石刻浣花夫人像三月三日爲  
夫人生日傾城出游亦止稱浣花夫人冀國之號  
未知何代所封也

新舊書未詳冀國崇封但傳奮臂一呼爲夫子守城爲  
小郎破賊 三四月歷數成都盛事且先邀頭大會以  
流觴佳節作設帳良辰

詒經精舍式古堂聯

詒經精舍講堂西徧有便坐焉余題曰式古堂并  
撰是聯

與諸君拜許鄭先師敢以空談荒實義 爲昭代存乾  
嘉學派須知經術卽文章

虎邱魁星閣聯

七月七日爲魁星生日見 國朝施可齋鴻保閩  
襍記葢閩中龍巖州有此說他處不知也吳下虎  
邱新建魁星閣落成余題是聯庶此說傳播三吳  
乎

勝地傍虎邱更登百尺樓臺已近九霄通瑞氣 奎光

射牛斗願共三吳雋艾長從七夕拜文星

于室張孺人輓聯

孺人名祖綬字綠硯于香草明經之室也能詞翰  
兼通經義香草治經得其襄助者爲多嘗課其女  
誦毛詩遂著詩問二卷亦女而士者也

廿一年佐夫培治經似此侶隨能有幾 三百篇爲女  
兒課讀至今箋注尙如新

廣東學使署光霽堂聯

爲花農題聯中事蹟均見花農詩紀不具錄

四面厥園林看喻學有齋校經有廬以及瑞芝籜外仙

石亭中好景無邊都向此堂呈勝概 九霄下鸞藻溯  
入興之翁儀徵之阮上而米老題詩雪翁葺屋前徽未  
遠更欣繼起得名流

任小沅中丞七十壽聯

中丞曾官浙江布政使後至浙江巡撫

屏藩節鉞半生來宦蹟兩至吾鄉僚友曰善士林曰善  
閭閻曰善 香山放翁七十歲詩篇並爲公壽富貴中  
人風雅中人神仙中人

彭岱霖觀察輓聯

觀察爲文敬公之子宦游吾浙其生也以十月十



七日夜時其歿也亦同之且其臨終處分身後事  
神色湛然若有甚異者亦必生有自來者也今年  
春曾偕吳清卿中丞訪我於俞樓清卿爲余門下  
士而觀察又出清卿之門清談良久進小食點心  
而別不謂此別遂千古也

宰相之子儒雅風流春閒過我清談卮酒杯羹敢謂門  
生出門下 神仙中人去來自在身後傳君奇事縣弧  
屬纊不徒同日又同時

朱伯華觀察輓聯

伯華曾從余游庚申春蘇州失陷同出危城轉徙

至越中相依一載有餘呼內子姚夫人爲母後以  
孝廉出爲監司署直隸清河道者一年加二品銜  
李傅相頗倚重之未登中壽而卒惜哉

昔年曾患難相依從吳下轉至越中辛苦道塗同留此  
烽火餘生何異一家骨肉 壯歲以孝廉筮仕由郎署  
出爲觀察勤勞王事止博得清河小試兼叨二品頭銜  
錢子密侍郎七十壽聯

子密乃子方同年之弟也受曾文正知最深在兩  
江幕府垂二十年後入都供職值樞廷累遷至工  
部侍郎矣子密小於余三歲戒余勿自稱弟而每

與通書輒忘之仍自稱弟乃加眾字於上作鬻字  
曰周人稱兄曰鬻也今年子密七十生日書此聯  
壽之并述前語爲戲

樞廷宿望戎幕舊游衣鉢得真傳會見兩江來建下  
八秩初開三年忝長軒楹題吉語不辭一笑再書鬻

徐壽蘅侍郎七十壽聯

侍郎視浙學時曾以余文章學問力薦於朝余  
固不知也及侍郎以此得嚴譴余始知之乃與書  
曰此事姑置之五百年後自有定論耳今侍郎年  
七十矣六月五日其生日也書此壽之并及前語

以爲一竿火

七十歲古稀庭院清涼好引碧筒招客飲 五百年論  
定文章道義可容青史附公傳

李母陶太淑人輓聯

淑人生於嘉慶二十二年丁丑歿於光緒十八年  
十二月月建在丑又曰吾於丑時歸及卒果丑時  
早寡無子抱夫弟之子爲子其夕夢人以榴實示  
之拈其一子及所抱子來目有紅點生平言笑不  
苟每謂物力艱難不可不惜食畢輒令人於案下  
檢尋遺粒其嗣子名濱官浙中仕而不廢學亦佳

士也

生丑年歿丑月又豫訂丑時平居懿美不勝書小物克勤珍此稻匙一點雪始賢婦繼賢母遂致成賢子異時造就未可量循聲大起拈來榴實十分紅

張勤果公祠聯

公立功西域薨於山東巡撫之位相傳爲張桓侯轉世見於蒯士薌廉訪所譏岳忠武祠聯跋語蒯其至親當不誣也

唐留姓宋留名又爲熙朝鍾閒氣太山雲天山雪長於浙水護靈旗

彭剛直公衡州專祠聯

公西湖專祠余已爲題聯矣聞衡州祠成又寄此聯

儒雅是書生英武是宿將赤心許國是社稷臣長留俎豆旂常突兀崇祠壯南嶽發軔在湘中轉戰在江上白髮籌邊在嶺海外追數艱難辛苦淒涼老友哭西湖盛旭人方伯八十壽聯

方伯之哲嗣杏孫觀察亦行年五十矣方爲天津海關道明年恭值

皇太后萬壽慶典方伯由天津入京祝嘏必與在籍九

老之列益 慶典例有文九老武九老在籍九老  
謂之三九老云

與賢郎合作百卅齡疊舉兕觥上壽 看明歲徵爲三  
九老同扶鳩杖趨朝

許星叔尙書輓聯

星叔以內閣中書起家官至尙書軍機大臣以微  
疴遽卒贈太子太保諡恭慎亦備極哀榮其明年  
恭遇 萬壽慶典樞廷諸臣皆膺異數之 恩則  
君不及矣

起家直閣秉政樞廷中外交推洵不愧丁卯橋百年喬

木 疊晉宮銜茂膺諡典哀榮備至惜未逮甲午歲萬

壽恩綸

聶仲芳廉訪四十壽聯

廉訪爲曾文正公之婿由蘇松太道遷浙江按察  
使行年四十正 萬壽慶典之年也

九重慶延及臣家一時中外豔傳謂吾師文正公真  
能擇婿 四十華年晉陳臬事此後勲名鼎盛是本朝  
咸同後繼起名臣

潘母汪太夫人輓聯

太夫人爲文恭相國季子婦年至八十未逮生日

而卒

出自名門嬪於相門慶典躬逢鳩杖方期頌內府 生  
在冬日歿當秋日耄齡已屆兕觥未及進華堂

宋母彭夫人八十壽聯

彭夫人為宋叔元觀察德配長子樹之筮仕吾浙  
次子澄之應試金陵皆有時譽八月十四日其生  
日也

看長君鵲起聽仲子鹿鳴都為萱堂添福壽 距百歲  
甘齡先中秋一日長斟桂酌祝期頤

許子社明經輓聯

子社於今年元旦作五言絕句一首句首冠以甲  
午大吉四字和者甚眾

大吉竟無憑空流傳甲午元旦 舊游能有幾又凋零

丁卯詩人

孫鏡江吏部輓聯

鏡江以進士官吏部改以知縣官江西罷歸以安  
定書院山長終性嗜金石嘗以同鄉吳氏所藏齊  
侯壘謂考訂有誤又好散氏盤銘命其女公子摹  
之書扇面見贈今年來見我於右台仙館其名刺  
乃鐘鼎文也

登進士第官吏部郎花縣歸來竟以山長老 摹散盤  
文訂齊巖誤草堂投刺早作古人看

沈仲復中丞輓聯

仲復以安徽巡撫內召於姑蘇小住卽擬入京恭  
祝 皇太后萬壽未及啟行以疾卒於蘇寓  
之耦園

謝玉節以歸來盛典恭逢正擬衣冠趨北闕 愛金閭  
而小築名園大好不堪絲竹冷東山

潘偉如中丞八十壽聯

中丞由微秩起家官至貴州巡撫引疾家居年登

八秩七月之望乃其生日夫人沈氏白首齊眉亦  
佳話也

任封疆萬里受知遇四朝備歷官階到開府 距百歲  
廿年先中秋一月安排家讌祝齊眉

又輓聯

中丞生日後逾一月旋卒遺疏入 詔視巡撫例  
賜卹

溯縣弧穀旦到撤瑟靈辰一月光陰歌泣異 從牧令  
起家以封疆致仕九重恩禮始終全  
于母姚孺人七十壽聯

聯中云云皆述孺人之言也  
孺人爲于香草明經之母七十生日戒勿稱觴命  
以所費周親族之貧者香草因請余書此聯壽之

幼承祖訓老授孫書謂兒勿急科名課爾曹三百篇毛  
詩殊有味 年屆古稀月逢瑞臘爲吾小鄉里道我  
母八十歲耄壽未稱觴

桐山居士七十壽聯

居士名鳳瑞字桐山號如如老人杭州駐防曾刻  
小印曰曲園門下走狗亦旗營中一老詩人也今  
年七十矣以詩稿見示并乞壽聯書此贈之其生

日爲十一月二十三日乃冬至前三日

讀厄言七章及襍言諸篇想見其人嶽崎厯落 前陽  
生三日爲先生上壽從今以往耄耋期頤

王母周太淑人輓聯

太淑人爲王可莊太守之母其始歸也及事祖舅  
文勤公隨宦厯秦晉蜀而荆布如寒素晚年子孫  
森立長君可莊以進士第一人出守鎮江移守蘇  
州皆有惠政至今遺愛猶存

隨秦晉蜀使節歸來依然裙布釵荆不愧文勤家法  
有子孫曾英材繼起看取召棠郇黍常留吳會名區

陸存齋觀察輓聯

存齋以觀察使官廣東福建咸以大用期之而竟  
不果然收藏書籍富甲海內亦足以豪矣

歷官閩粵聲望滿朝中大可由柏署薇垣到開府 舊  
籍宋元收藏冠海內忍拋却曹倉杜庫去修文

朱母陳太淑人輓聯

淑人爲朱萍華大令之母年八十一而終有三子  
兩孫其長君先卒

生甲年歿甲年上壽八旬去歲曾經進春酒 子二人  
孫二人考終一笑長君先已待泉臺

楹聯錄存四

德清俞樾

孫琴西同年輓聯

琴西以翰林直 上書房出守安慶歷官至江甯  
布政使以太僕卿內召引疾歸工詩文兼喜校刻  
其鄉先輩遺書與余爲丁酉甲辰庚戌三次同年  
雖學術門戶不同而頗相得年至八十而終其官  
翰林時再上封事甚切非徒以文學見者也

數丁酉甲辰庚戌三度同年洵推理學名臣內官禁近  
外任屏藩晚以太僕歸田老去白頭重游泮水 刻橫



塘竹軒水心諸家遺集自任永嘉嫡派文法桐城詩宗  
山谷更有封章傳世將來青史豈僅儒林

廖穀士中丞六十壽聯

中丞以二月十六日生時方撫吾浙

春滿浙東西百五韶光鍾五百名世 月明弦上下十

六望日慶六十生辰

余母程太夫人輓聯

太夫人爲余古香觀察之母正月八日生年八十

九而卒已有元孫惜其子皆前卒矣

耄耋屆九旬止欠一齡正擬壽筵開穀日 曾元羅五

世僅虛一代已堪人瑞告楓宸

沈母蔣太夫人輓聯

太夫人爲雪門先生之配光緒二十年年九十有

七遵 例計閏作爲一百歲 奏建百歲坊并奉

旨加 賞上用緞一匹銀十兩至二十一年五月

而卒有子二人孫十三人曾孫十五人元孫三人

可稱全福矣

賜壽有加隆上溯嘉道咸同來計閏一百零一歲 歸

眞無遺憾俯看子孫曾元輩送終三十又三人

林篤甫太史輓聯

太史自貴州學政罷歸卽僑居吳下其先德夢一  
僧入室而生太史去年又夢受命爲揚州府城隍  
或不誣也臨卒前二日猶向其妻弟憚季文內翰  
問余安否亦可感矣  
同館論交情又兼同寓胥閭垂死病中猶念我 前年  
徵夢兆更溯前身寒拾歸眞去後定成神

朱煥文總戎輓聯

曾忠襄收復金陵時從龍脖子地道首先衝入者  
煥文也而敘首功竟不之及時論惜之其任雲南  
鶴麗鎮曾發火槍斃一虎繪殺虎圖余有詩存集

中乙未夏防寇海上卒於軍中

海上落大星爭傳當日戰功匹馬衝開龍脖子 吳中  
懷舊雨聽話平生快事一槍擊斃虎於菟

楊石泉制府七十壽聯

制府時督陝廿九月九日其生日也從前六十生  
辰 上賜以四字額曰巖疆錫羨想古稀之慶  
錫賚必有加矣

柱石久銘勳逢重九節拜九重恩命 巖疆仍錫羨賜  
十七物祝七十生辰

瓜爾佳那拉太夫人輓聯

太夫人爲奎樂峯中丞之母中丞由蘇撫調陝撫  
奉母北上行次上海待輪船未發太夫人暴疾卒  
時七月七日也年八十有二

一品紫泥封三吳移駐三秦海國騰輪剛待展 八旬  
黃髮壽七月適當七日天孫雲錦遽來迎

陸母程太夫人輓聯

太夫人爲陸鳳石祭酒之母鳳石在京因母老乞  
歸歸未兩月而太夫人卒矣鳳石乃吳中舊家康  
熙二十四年乙丑狀元名肯堂者其八世祖也至  
同治十三年甲戌而鳳石亦魁天下吳人稱之

當年以狀元母撤穀城頭鄉里豔傳重振大魁舊門第  
有子爲國學師陳情闕下君恩終養是稱全福太夫  
人

呂庭芷同年輓聯

庭芷爲余庚戌同年入翰林時年止二十有三然  
在京供職時甚少曾從左文襄於甘肅軍中又在  
閩筦船政事奔走半生去年始 簡放永定河道  
未之官卒於家

回憶登金榜入玉堂我正三旬君甫越二旬角逐青雲  
垂老追思都是夢 最隣走甘涼游閩嶠西行萬里南

亦數千里奔馳白首真除虛拜未之官

陸母徐太夫人輓聯

太夫人爲陸星農同年之配星農乃庚戌榜大魁也其子孫頗盛去年一孫舉於鄉今年兩孫又同入學而其次君蔚亭太史又新授漢中府知府太夫人年八十矣乃以六月二十四日生而以六月十四日卒幸其家已先於四月稱觴矣

梅魁門第尙有清風一孫攀桂兩孫採芹更報次君以二千石領郡蓮界往來皆宜長夏廿四生辰十四忌日幸先三月爲八十歲稱觴

許蔭庭觀察輓聯

觀察乃恭愼公之胞弟生平篤好內典年六十六而卒

古稀將屆未滿四齡如何慧業已終佛坐催歸大弟子恭愼云亡甫逾兩稔誰料德星又隕鄉閭頓失老成人

嚴母周太夫人輓聯

太夫人爲石阡太守之配太守死寇難夫人撫其孤子以至成立其子開第時生甫六月今亦官觀察矣乙未五月值太守忌日夫人作詩云教子成

名慰九泉佳兒端不負君賢怪他天上輕離別棄  
我於今三十年是歲竟卒所著有硯香閣詩鈔又  
平時最敬岳忠武王撰精忠傳彈詞四十卷  
劍負兒已繼家聲卅載睽違嘉耦依然共瑤島 硯香  
閣流傳遺稿萬家彈唱粹編更爲補金陀

汪耕餘觀察輓聯

耕餘由縣令起家以道員需次江蘇所居有小園  
花木頗勝余每詣之必飲以洞庭山僧所餉碧羅  
春佳茗蓋耕餘宰吳縣時曾有德於山僧也

官從牧令起家躋歷監司黃歇故墟頌餘愛 居有園

林之勝每來便坐碧蘿新茗佐清談

趙母鄧太恭人輓聯

太恭人爲鄧嶰筠制府之女歸趙惠甫刺史其嫁  
時奩裝甚盛盡以佐家不蓄私囊自幼卽博習羣  
書然未嘗以詩文自炫能繪仕女亦不輕爲人作  
也

袁倫始嫁資遣甚豐不蓄私財盡出奩裝佐家計 徐  
淑能文丹青兼擅恥留虛譽惟將著述助夫君

鄭聽篁同年輓聯

余與聽篁同副道光丁酉賢書及余於甲辰舉於

鄉而聽篁又中副車凡三登副榜而後舉孝廉成  
進士始官刑部繼入諫垣一生謹慎同官皆重之  
少時曾受業於先君子之門有三子長君興樑  
已官工部矣

自丁酉至甲辰兩回到月宮溯文字因緣又向先君  
親受業由刑曹而臺諫卅載服官日下論平生謹慎  
固宜後輩克承家

孫師母趙夫人七十壽聯

趙夫人爲余房師孫文節公之配今年十二月值  
其七十生日書此聯壽之文節公會官吏部侍郎

故人目其所居爲天官第云

披一品服稱七旬觴臘鼓頻催已轉青陽新節序 唱  
王母謠登天官第仙籌遙獻尙存白髮老門生

賀室樊夫人輓聯

夫人爲賀仲愚太守之配久病不瘳遂至不起時  
太守奉差江右得信馳歸距夫人之卒久矣余大  
兒婦乃其胞姊十月中在杭州相別猶云明年再  
見亦可悲也

痼疾四年餘痛遠道征夫殘臘馳歸未及一言成永訣  
賢聲三黨徧歎吾家兒婦小春握別猶將再見訂重

來

金友筠處士輓聯

友筠名文潮青浦人與余神交十年書問頻通而未一面年逾六十衰病相乘猶謂明春如小愈當來蘇一見以遂平生之願竟不及也其婦先數月卒其子名詠榴頗有聲庠序間

十餘年老友兩心相契半面未謀衰病已難支猶冀明春見我 六豔外考終與婦偕行有兒繼起顯揚應可待愧無巨筆傳君

沈母錢太夫人輓聯

太夫人爲笛伊太守之母年六十五歲於正月九日卒於金陵寓館有孫三人

周甲又五齡欣看子舍黃堂率總角三孫來舞綵 建寅纔九日悵望慈輶白下先上元七夕去游仙

曹錦濤孝廉輓聯

孝廉曾主甯波船捐局賊勢逼近凡海舶之不得出口者一夕給牌放行全活數千人精岐黃術傳其長子元恆以醫名吳下餘二子皆成進士福元官編修元弼官內閣中書

活數千人傾側擾攘之中豈惟是肘後一編堪濟世

送七十翁福壽全歸而去最難者膝前三子盡知名

朱象甫喜聯

象甫爲竹石觀察之子娶嚴琴墅孝廉女二月十

六日於吳中成禮

門第紫陽高百兩香車分到嚴陵清氣 園林紅杏開

一雙嘉耦占將吳苑春光

楊敏齋太守輓聯

敏齋爲壬甫家兄同年以刑部主事改官江蘇曾

權知太倉直隸州後爲牙釐局提調二十餘年

郎官出典方州豈惟是權算緡錢爲盛朝小佐軍興費

暮齒回思往事最難忘提攜席帽與伯氏同膺鄉舉  
年

惲母戴夫人七十壽聯

夫人爲惲次山中丞之配年六十時余曾以一聯

壽之今又壽以此聯

溯從前中外敷歷善相其夫彤管錄中無此才無此識  
詩畫兼長猶爲餘事 願自後耄耋期頤永錫難老金  
萱堂上有賢子有賢孫勳名克紹大慰慈懷

杭州府學鄉賢祠聯

明時杭州府學鄉賢祠以漢嚴先生光居首然先



生實非杭人也乾隆間始撤去之以晉臨淮太守  
范平居首

遠稽晉代近逮熙朝駿烈清芬豈僅詩文垂浙派  
山號武林湖名明聖鍾靈毓秀不須聲望借巖陵

惠菱舫都轉輓聯

都轉權浙鹽最久善丹青有墨竹數幅刻石敷文  
講舍喜戴文節所著畫絮壽之剞劂曾贈余方竹  
枝一枝至今存焉

十載總鹽綱任他人旌節飛揚老我閒情看畫絮  
數竿留墨妙記從君湖山談笑贈余長物有吟筇

林雲臺廣文輓聯

廣文乃乙酉拔貢與余孫有同歲之誼於光緒十  
七年五月選就德清訓導至二十二年五月卒於  
官所異者廣文以五月十九日卒年四十三其孺  
人王氏於五月十八日卒年四十二生則先後一  
年死則先後一日似亦非偶然也

六載講堂開以五月選官以五月卒官回思記織登科  
僥倖吾孫叨附尾 雙驂仙馭並遲一年出世遲一日  
逝世恰稱詩歌偕老逍遙嘉耦總隨肩

陳舫仙方伯輓聯

方伯爲湘軍宿將及東洋啟釁以江蘇按察使奉命赴山海關防堵積勞三載事平而君遽歿甫遷江西布政使未及赴也然直督以開缺告而奉硃筆垂問其戰績遂得宣付史館亦可知其上契者深矣

湘軍宿將如公者幾人詔書下問戰績上陳足見英名動天聽 遼海籌防積勞至三載方岳甫遷大星遽隕長留威望鎮遐荒

楊見山太守輓聯

見山乃吾湖名孝廉以太守官吳中一攝常州守

而罷然其翰墨頗行於時余與蹤跡稍疏去歲余著迂議一篇見山讀之則曰語語如吾所欲出云卒年七十八長於余兩歲

循良小試翰墨盛行兩歲耄齡先我老 蹤跡久疏文章深契一篇迂議愜君心

諸暨錢氏宗祠聯

錢氏爲武肅王之後其裔孫士芳求撰是聯聯中所述皆其所自述也

合數百里之秀若雁池若龍山若篠嶺若亢陽環抱崇祠恰稱五王俎豆 溯卅餘世以來有名宦有循吏有

武功有文學蔚成巨族長絲千禩蒸嘗

兄子劍孫輓聯

先大夫登嘉慶丙子賢書越六十年光緒丙子劍  
孫繼之祖孫同丙子一時以爲佳話方冀其昌大  
吾家不謂其盛年殂謝客處羊城也

六十年接續科名戚黨豔稱謂此幼孫同符大父 五  
千里歸來旅櫬門庭衰落痛吾猶子追念先兄

黃母劉太夫人輓聯

太夫人爲莘農侍郎之配幼農觀察之母生於四  
月歿於九月年九十三

封膺一品年近百齡福壽兼全信有汾陽在中幃 首

真稱觴暮秋含玉音容頓渺徒勞翁叔泣甘泉

龍仁陔方伯輓聯

方伯廉儉所至有聲下僚皆畏憚之余今年始與  
相見其執禮甚謙別未數月遽聞其卒時太夫人  
年九十四猶在堂也

持己以儉接人以謙尤推吏治精詳能爲聖朝除弊政  
惠澤在民勛勞在國堪歎中年殂謝翻教老母泣高

堂

施少欽封翁輓聯

少欽寓上海久凡直隸山東山西陝西河南各省  
無不力籌振濟 聖書褒美海內稱善人年六十  
九而卒臨終大呼善舉者三可謂中心好仁者矣  
朝廷曰賢鄉里曰賢海內皆曰賢如何天不憖遺古稀  
欠一 集貲無算活人無算陰德更無算堪歎歿而猶  
視善舉呼三

汪伯春任子新婚喜聯

伯春為柳門侍郎猶子以子畜之故得二品蔭生  
所娶婦乃柳門婿曾孟樸之妹諺所謂來則為姑  
去則為嫂者惟姑嫂之稱起於後世唐宋以來類

書從無姑嫂一門吾浙平湖縣有姑嫂餅見於志  
書余嘗啖之戲用此事為聯語賀其新婚

喜氣溢門闌競說朱陳重結好 華筵啟湯餅笑看姑  
嫂互嘗新

謝綏之太守輓聯

綏之蘇州人以善士聞天下凡四方水旱偏災皆  
集貲振之

一鄉之善士友天下之善士 國人皆曰賢諸大夫皆  
曰賢

吳誼卿觀察輓聯

聯四  
誼卿以翰林厯佐督撫幕府積功保至道員偶感  
風疾遂至不起今年六十豫爲稱觴及至生日則  
逝已經月矣

名翰林負幹濟長才籌筆勤勞一道福星虛注籍 病  
維摩視形骸外物盤鈴游戲六旬生日豫稱觴

沈旭初觀察六十壽聯

觀察生於正月十二日夫人謝氏

前元宵三日弧輓同陳先生沈休文夫人謝道韞 由  
中壽六旬臺萊進祝會昌一品集平原百年歌  
法相寺定光佛殿聯

定光佛卽然燈古佛如來所從受記者也在五代  
時出世爲長耳和尚至今真身尙在香火極盛求  
子甚靈宋朱弁曲洧舊聞言宋太祖高宗均定光  
佛轉世

衍大法於千佛出世之前如來五百年密記親承自昔  
傳燈推鼻祖 顯靈蹟在三鳳開山以上有宋十八帝  
真人再降至今錫福逮嬰媿

曹仙槎巖尹五十壽聯

八月初三日生

平分百歲光陰河圖五洛書十 領畧四時風景秋一

半月初三

余澹湖太守輓聯

太守爲古香觀察之子古香乃余杭州舊雨也太  
守筦蘇州六門釐局卒於行館

兩代論交情杭州舊酒痕吳郡新詩本 六門頌遺愛  
商賈藏於市行旅出其塗

曾君表孝廉輓聯

君表曾肄業紫陽書院亦在門下之列家居常熟  
極園林之勝母年八十餘子孟樸亦登賢書矣

居虞山勝地又有好園林上奉母歡下課兒讀 憶吳

苑舊游可爲長大息旣悲君逝更念吾衰

陳母王太孺人七十壽聯

孺人爲陳孝廉洛東之母有子四人孫五人除夕  
其生日也

開除夕之筵子四人孫五人同承歡笑 越古稀而上  
耄八十耄九十直至期頤

楊石泉制府輓聯

公爲浙臬時余卽與相識嗣是每歲春秋必再相  
見或泛舟西湖或同飲雲棲山中上聯所云皆實  
事也

識公於廉問兩浙時尋詩湖上載酒山中歎逝水光陰  
歷歷舊游還似昨 論功在咸同百戰後投筆衡湘建  
旌秦隴問凌煙圖畫寥寥宿將更何人

宋母彭夫人輓聯

夫人爲宋叔元觀察之配年八十歲時曾作自壽  
文傳播於時今年正月十六日卒年近九旬矣  
三五月初圓令節纔過何意上元旋罷宴 九十日有  
秩毫齡將滿不能自壽再成文

劉吉園總戎七十壽聯

總戎時鎮溫州其地有九鳳山

五穀年高帝命作東甌重鎮 九鳳春滿軍門拜南極  
仙翁

翁少畦大令輓聯

少畦爲翁蘭畦廉訪之子性真摯且有用世之才  
嘗著書生初見一書皆言治理又著醫時六言一  
書則因東洋之釁發憤而作者也以知縣需次吳  
中卽執摯來見願居門下情意殷然其兄少蘭亦  
負美材於前年十二月卒君篤於手足爲其兄營  
喪葬畢遂成心疾今年正月八日卒於蘇寓

讀所著之書兩卷論治六卷談兵其才其識迥異恆流

何幸吾門得此士 不可知者命前歲兄亡今歲弟逝  
至性至情鬱爲心疾空留祖笏待將來

錢氏孝子烈婦祠聯

錢君諱堅字竹卿始以孝子旌及庚辛之亂與妻  
唐氏同死於難又各旌如律其子耕伯大令乞題  
此聯於其祠中

前旌孝後旌忠兩回邀九陛恩綸不媿家風承武肅  
夫死義婦死烈一日成千秋大節長留祠宇在吳閩

惲伯方同年輓聯

伯方乃余庚戌同年由庶常改部曹以知府官貴

州時撫黔者爲曾文誠公亦庚戌同年也甚器之  
調補首府 奏以道員升用及文成卒繼之者不  
慊於君君知直道難容引疾而歸年逾八十重游  
泮水亦一魯靈光也

遠宦到黔中循聲卓卓風骨棱棱如何直道難容竟以  
二千石歸觀察頭銜虛注籍 舊游思日下春夢重重  
晨星落落聞說泮宮兩賦不能六十年後恩榮關宴再  
登筵

查室蔣淑人輓聯

淑人爲余孫陸雲同年翼甫大令之室其婚在咸



豐辛酉之冬兩家同避兵在滬因贅如焉翼甫曾  
充日本使者隨員淑人從之居海外橫濱者兩年  
去年冬在吳下謀爲其子理生授室拮据拮据而  
病已甚新婦甫入門淑人已卒未及一月理生亦  
卒新婦朱氏年甫二十毀妝守志亦可哀也

兵戈擾攘時黃浦催妝最憐鷄翼雙飛海外共看妻鳥  
月病榻彌留際青廬迎婦誰料鳳雛同去閨中空賸  
女貞花

聶母張太夫人七十壽聯

太夫人爲仲芳方伯之母方伯奉觴上壽并醢子

迎婦率以承歡洵盛事也

矍鑠七旬人上壽到頤齡崇封登極品 團樂一堂上  
今年看新婦明歲抱曾孫

吳季蓉世兄新婚賀聯

季蓉乃廣庵廉訪之子其所娶桃源尹氏乃吾同  
年杏農觀察女孫也

一雙嘉耦於柏府趨庭春色滿延陵門第 百兩香車  
自桃源發軔風流想尹吉衣冠

費幼亭觀察七十壽聯

幼亭始以知縣官直隸曾以事至京師適英吉利

入犯焚 圓明園幼亭奉恭邸命入敵營議定和約由此知名後以清河道謝病歸優游林下濱江沙田皆君產也助入南菁書院日以擴充多至八萬畝嘗語余曰此歸田以來第一快事也

雙鑠七旬翁從前單騎入敵營尙有勳名留北闕 膏腴八萬畝此後諸生游講舍長傳歌頌滿南菁

又輓聯

觀察擬於四月十六日稱觴乃前三日而卒因輓以此聯

小雅賦南山止爭三日光陰未啟七旬筵宴 大名留

北闕猶憶片言卻敵爭傳單騎成功

王母李太夫人七十壽聯

太夫人爲王文勤公側室以嫡孫官受 封長齋奉佛而治家極嚴孫曾輩皆敬畏之

開八旬耄壽受二品榮封五色紫頌天上誥 治百口謹嚴養一心淡泊六時青守佛前鐙

鄭母李太恭人七十壽聯

太恭人爲肖彭大令之母肖彭與吾孫同年其弟則吾兄子劔孫同年也六月中生日寄此壽之

六月祝千春筵前雪藕冰桃阿母七旬初度 一堂羅

二俊膝下金昆玉友吾家兩代同年

吳廣庵方伯輓聯

廣庵乃老友平齋觀察之子中進士甲第甚高以  
請歸原班不入翰苑遂以直隸州起家官至江蘇  
臬使遷閩藩未赴而卒前數日猶得其書也

名父子大振家聲紀羣交誼同客姑蘇病榻數行猶報  
我翰苑才出居外服牧令循良躋登方岳宦游卅載  
不離吳

陳母黃太淑人八十壽聯

太淑人爲陳杏蓀太史之母寓居滬上精力甚強

猶能坐馬車游洋場也正月十二爲其生日

杖履八旬人但期歲歲清游安穩版輿黃歇浦 笙歌

正月夜共羨婆婆老福斑斕彩服玉堂仙

鮑竹生明經六十壽聯

余丙寅丁卯主講紫陽竹生曾肄業焉故亦在門  
下中年後以醫名噪吳中正月十二日其生日也  
距元旦已十日距元宵尙三日祝君甲子一周茂苑尋  
春先歸董奉林閒杏 負文名逾廿年負醫名又卅年  
憶我丙丁兩載講堂較藝會賞江淹筆底花

桐子霑觀察輓聯

子霑由蘇州府遷糧道己亥春將押運北上未果  
而卒

財賦筦三吳綠水洋中將轉漕 謳歌盈萬戶白公祠  
畔共焚香

張漢章司馬輓聯

漢章爲兄子祖綏丙子科同年其宰江山也曾表  
章毛烈女余爲賦詩事詳詩集其宰吾邑也適值  
余重游泮水之年余雅不欲上瀆官師而君必以  
聞於學使者亦可感也

名孝廉竟以循吏傳不惟婦監謳歌并使烈女一抒泉

壤氣 舊部民叨附年家諒回憶溪山坐嘯曾爲老夫  
再賦泮宮詩

丁潛生廉訪輓聯

潛生少時從軍母劉夫人刺八字於其臂上曰忠  
心報國致身事君故潛生在軍不避危險頗著戰  
功曾文正彭剛直皆極賞之嘗自練藤牌二千五  
百人成一軍所向無前余謂此制火器之良法也  
有如公等者數人無憂西戎矣精繪事能爲人寫  
真曾寫余真苦未肖去年冬攜一人來以西法照  
余小像蓋欲用此爲藍本也然竟不及爲矣今所

照像猶在兼有潛生像及世振之都轉像蓋三人  
同照云

奉母教刺臂教忠卅年功佐中興如文正如剛直皆歎  
賞英雄尙期制勝重洋精練滾牌成勁旅 莅吾鄉建  
牙陳臬一見歡同舊識於湖樓於山館每從容談笑惜  
未傳神阿堵但留照像在空齋

丁松生大令輓聯

松生藏書甚富善蒐輯杭州掌故刻武林叢書數  
百卷往年浙中鈔補 文瀾閣書松生力也余與  
交最久余著瓊英小錄君刻入武林叢書中又嘗

以娑羅樹一小株贈余今種吳寓

插架八萬卷鈔補文瀾全書采輯武林故事 論交四

十年商定仙花小譜分栽佛樹靈根

徐季和學使輓聯

季和持正論不隨俗君子人也終於安徽學使任  
士論惜之其視浙學時嘗徒步訪余於右台仙館  
是日蓋其生日也

爲朝廷深惜老成人方期正學扶輪何意噩音來皖北  
同詞館兼叨年世誼猶憶生辰避客曾勞健步訪山

中

朱茗笙侍郎輓聯

侍郎以水部郎起家至少司馬年甫五十引疾歸  
田鄉里善舉無不首倡之建復六和塔其功尤鉅  
慕吳中獅子林之勝於里第做爲之峰巒千萬湧  
見庭中取紫陽詩意署曰湧巒樓

歷官至少司馬歸來林下優游廿年功在梓鄉開化寺  
前重建塔 疊石如大狻倪移到吳中名勝一旦神游  
蓬島湧巒樓上孰憑欄

謝母楊夫人輓聯

夫人餘姚人爲子蓉部郎之母其女名又花字韻

仙彭剛直女弟子也曾來見我於湖樓

是節母是壽母二品崇封早拜恩榮來北闕 有賢子

有賢女一江遠隔曾聞剛直話西湖

朱竹石觀察六十壽聯

時觀察方權江蘇按察使以賢員聞傳 旨嘉獎

帝曰汝子嘉正自九重傳獎勵 天錫公純嘏好從六

十祝期頤

毛葆園處士輓聯

葆園白手起家人甚誠篤余與交二十年湖樓山  
館皆託其照料去年余自湖上歸尙來相送不意

竟永訣也葆園事佛終年不茹葷血今歲七十矣  
七月初微疾夢見地藏王菩薩語其子曰我不起  
矣至中元日跌坐而卒有四子存者二皆縣學生  
古佛夢中迎七旬善果竟證菩提到中元跌坐而終了  
無病狀 故人湖上別廿載交情頓歸逝水盼後輩踵  
興勿替大振家聲

黃漱蘭侍郎輓聯

余去年辭詒經講席浙撫廖中丞以侍郎代之未  
半載而卒時五月九日竟未及一至精舍也  
飲端五酒駐君四日流光朝野千秋同想望 坐第一

樓繼我卅年陳跡雲山三竺未來游

尤春畦封翁輓聯

翁善別人獲凡人獲自關外至皆集於上海翁歲  
必至滬品定其高下一經翁定無能違者今翁歿  
矣未知繼其術者尙有人否也

滬上罷清游北斗瑤光愁減色 吳中推老輩西堂葆

組喜傳家

程省卿孝廉輓聯

省卿幼慧其父有吾家千里駒之歎長而幕遊皖  
北賦梅花詩百首見賞於學使者餽於庠後舉孝

廉以知縣筮仕江蘇未補官而卒臨終語其弟錫  
煥曰吾死後得曲園先生一聯刻入楹聯錄存中  
死無憾矣余初不相識感其意爲題此聯

髫齡夙慧強仕壽終回思喜動椿庭曾博名駒千里譽  
琴桂有年栽花無地僅得名馳蓮幕傳誦寒梅百首

詩

王竹侯方伯輓聯

方伯爲丁酉拔貢生仕至陝西藩司年八十九而  
終余丁酉副貢與有同年之誼輓以此聯

昔布秦中德政今推海內靈光計閏歲九旬逾二歲

君舉拔萃高科我登待補小榜作同年六十有三年

李小荃制府輓聯

公起家淮軍官至兩廣總督往年撫浙時曾招余  
飲日暮不及出城因止宿於花廳之西廂翦燭清  
談漏三下始罷余主講西湖精舍宿於城中者止  
此一夕至今猶記之也

大樹蔭長淮看幕府宏開萬里威名到南海 甘棠留  
兩浙憶節堂止宿一宵清話共西窗

江建霞京堂輓聯

建霞以編修 特旨用四品京堂旋褫職會視湖



南學刻有靈鷲館叢書

无妄福无妄災孤負此金馬門前雍容大作手 非當  
人非常遇流傳得靈鷲閣上蒼叢小叢書

陳哲甫太守輓聯

哲甫乃錢子密尙書之女婿曾從子密在會文正  
軍中以奉母早歸故功名不顯以知府候選而已  
子五人出仕者已四人陳氏固海甯望族哲甫乃  
相國文簡公來孫也

功名讓同輩簪笏付後人落落家風不媿黃扉舊門第  
官職未真除年華止中壽蕭蕭婿水難爲白髮老尙

書

謝韻仙女史輓聯

女史上虞人歸麋氏早寡能詩乃彭剛直之女弟  
子也以剛直故願隸余門下余謝不敢當然其意  
甚殷曾渡江見我於湖樓臨別訂期後會而竟不  
果去冬大病稍閒猶覽書告病閒乃至今年正月  
二日竟逝余曾序其詩今又寄此聯輓之

病榻報粗安其時已屆三冬如何飲罷屠蘇未許春光  
轉東陸 寓樓曾過訪此後竟難一面料得神隨剛直  
仍吟秋色到西湖女史有和剛直秋色諸詠

潘暉琴學士輓聯

學士曾再至浙中前典試後視學也視學時繼阮  
文達輯兩浙輶軒續錄署中建輯雅堂卽其選詩  
所去浙後浙士思慕之奉生位於朱文公祠吾孫  
陸雲乃其典試所得士

與吾浙有文字緣兩度乘輶繼阮太傅輶軒成後集  
許我孫列門牆末一堂輯雅附朱紫陽祠宇拜先生

李健齋廉訪輓聯

廉訪以父忠武公殉難三河 賞舉人會試不售  
引見 賞員外郎嗣是敷歷中外往年遼東告警

從督部劉公北征戰於唐玉山七里河大捷斬其  
酋至己亥歲意人索我三門灣浙有兵事拜浙江  
按察使旋 命督辦軍務卒於甯波行營

繼忠武公投筆從戎昔年遼警方殷七里河邊竿賊首  
以廉訪使登壇拜將此日海氛未靖三門灣外激英

風

查湘帆封翁輓聯

封翁行賈滬上有法蘭西人嗎呢者設一肆延翁  
主其事一無私焉生平四遭回祿之災艱苦備嘗  
晚年以子濟元官封二品年七十一而卒

四度遭鬱攸災辛苦艱難爲此老養成晚年福 七旬  
拜榮祿誥忠信篤敬雖遠人訂作出門交

龔母張太夫人輓聯

太夫人歿於滬上歸葬合肥有二子心銘心釗皆

翰林也

封崇一品壽近七旬蓬島催回金母駕 風送滬濱神

歸肥水麻衣對泣玉堂仙

陳養原觀察輓聯

觀察會隨崇地山侍郎出使俄國又充日本星使

參贊官後授浙江溫處道調署杭嘉湖道署按察

使卒於官

大瀛海外仙槎西至羅利東至扶桑萬里重洋游跡廣

三折江邊宦轍始而觀察繼而廉訪四年兩浙頌聲

長

常介之參戎輓聯

參戎乃浙江將軍常公恩之弟官江蘇撫標中軍

參將於正月十三日卒於官年五十九

大衍又九齡雄鎮蘇臺胥母門邊貔虎壯 元宵先兩

日耗傳浙水將軍樹上鶴鴿孤

汪李門封君五十壽聯

李門爲柳門侍郎之弟以瞽廢然多材能閒居足以自娛視柳門似勝也因其五十生辰書此壽之郭幼明乃子儀之母弟見錢易南部新書唐汝詢字仲言華亭人無目而嘯咏不廢見靜志居詩話郭幼明真大富貴 康汝詢不廢嘯歌

趙紫瑜大令輓聯

紫瑜以知縣官廣東罷官後挾玉遁星命之術浪游人閒自稱一笠山人所著詩文甚多推衍璇璣圖得五萬七千餘首亦奇觀也

一見宰官身挾技而游落托數十年存留飯顆山頭舊

笠 千秋才子筆以文爲戲縱橫五萬首推衍璇璣圖  
上新詩

陳杏孫太史輓聯

太史恆乞假家居僅一分校禮闈而已大考後召見 上問歷俸何淺以母老不能遠離對庚子考差後以病南回道卒太夫人猶在堂也

蓬山養望棘院論文天語垂詢憐俸淺 蕩節未持輜車遽駕親闈癡想盼兒歸

趙母陳太夫人輓聯

夫人生四子存者一卽仲瑩殿撰也已亥冬夫人

促仲瑩入京銷假今年秋卒於蘇寓仲瑩歸己不  
及見矣於重陽日受弔書此輓之

但期遠志不寄當歸鶴髮人催赴京華豈僅仙槎希八  
月已折三珠幸存片玉鼈頭客邁還吳下空將佳節  
泣重陽

倪儒粟明府輓聯

儒粟於今年閏八月卒於滬上余在西湖頻與往  
返贈余白牡丹一叢今猶在曲園也

申浦咽潮聲剛逢八月秋風憐君厄共黃楊樹 午欄  
鬪花韻猶記一叢春色爲我分來白牡丹

譚少柳太守輓聯

太守以州判起家官至二千石歷權劇郡屢筦大  
局亦能吏也曾署丹徒縣有營官縛盜五人至君  
察之皆冤也盡釋之此事頗爲沈文肅所稱今年  
秋已病甚矣聞 鑿輿西狩伏枕泣然越二日

遂卒

四十年宦轍總在吳中憐赤子無辜會活刀邊人五命  
二千石循聲久傳朝右聞翠華遠狩空流枕上淚雙  
行

宋養初侍御輓聯

光緒二十六年秋七月京城陷侍御仰藥死然其  
五月十七日寄其子書云急難時我自有主意家  
中勿念蓋死志久定矣

由拔萃登科筭歷諫垣乃逢陽九年百六厄運 以艱  
貞報國預存死志請看夏五月十七家書

右台仙館聯

余所築右台仙館無牆垣僅以槿籬圍之初落成  
時題此聯上句本東軒筆錄乃荆公事下聯則陶  
貞白傳中語也

所居不設牆垣望之儼若逆旅 有時獨游泉石見者

以爲仙人

又

余喜靜坐人事紛擾苦未能也山館中偶一爲之  
頗得靜趣因題此聯

七旬外老翁固知死之爲歸生之爲寄 半日內靜坐  
不識此是何地我是何人

又

上聯般若波羅密多心經語下聯金剛般若波羅  
密經語也對耦天成因書而縣之山館

無苦集滅道無智亦無得以無所得故 如夢幻泡影

如露亦如電應作如是觀

俞樓聯

俞樓落成余題此聯詳見俞樓經始已刻入俞樓  
稊纂矣

合名臣名士爲我築樓不待五百年後斯樓成矣 傍  
山南山北沿隄選勝得之六一泉側其勝何如

又

余主講誥經精舍三十一年可謂久矣戊戌秋以  
衰老乞退因攜孫兒陞雲至俞樓小住臨行題是  
聯是時陞雲新及弟兼以勉之

湖山戀我我戀湖山然老夫耄矣 科弟重人人重科

第願吾孫勉之

春在堂聯

余前有春在堂聯已錄存矣戊戌歲續題兩聯又  
錄存之

小圃如弓竹林前一曲柳陰後一曲 浮生若夢登第  
五十年成婚六十年

又

孫兒陞雲進學名次第一鄉試中式第二 殿試  
則以第三人及第因題此聯戚黨頗傳誦焉

念老夫畢世辛勤藏書數萬卷讀書數千卷著書數百  
卷 看吾孫更番僥倖童試第一名鄉試第二名殿試  
第三名

又

題內室以勉勵家人

周家忠厚開百世基況於民庶 武侯謹慎成一生事  
矧在庸愚

又

八十生日題八字於春在堂

南埭村民 右台山鬼

自撰輓聯

此聯既題於右台仙館又題於春在堂由來久矣  
未知何日果用計亦不遠也

生無補乎時死無損乎數辛辛苦著成五百卷書流  
播四方是亦足矣 仰不愧於天俯不忤於人浩浩落  
落慙數八十年事放懷一笑吾其歸乎







中国国家图书馆  
NATIONAL LIBRARY OF CHINA